

## DOMENIE I DI CUARESIME

### Antifone di jentrade cf. Sal 90,15-16

**C**uant che mi clamarà, i rispuindarai;  
lu salvarai e i darai une grande innomine,  
lu saciarai cuntune vite lungje.

**No si dîs** Glorie a Diu.

### Colete

Diu onipotent, pal sacrament de Cuaresime che o celebrîn ogni an,  
danus di rivâ a cognossi simpri plui a font il misteri di Crist  
e di compagnâlu cuntune vite degne di lui.  
Pal nestri Signôr Jesù Crist to Fi, che al è Diu  
e cun te al vîf e al regne dutune cul Spirtu Sant,  
par ducj i secui dai secui.

### PRIME LETURE Gjen 9,8-15

**Il pat jenfri Diu e Noè liberât des aghis dal diluvi.**

Dal libri de Gjenesi

Diu i fevelà a Noè e ai siei fîs: «Ve che o fâs un pat cun vualtris, e cun chei che a vignaran daûr di vualtris e cun ogni vivent che al è cun vualtris: ucei, nemâi, dutis lis bestiis salvadiis che a son cun vualtris, cun ducj chei che a son saltâts fûr da l'arcje, ven a stâi cun ducj i nemâi de tiere. O fâs un pat cun vualtris: dut ce che al è, nol sarà plui menât vie des aghis dal diluvi; no 'nt sarà plui diluvis par disfâ la tiere».

E Diu al disè:

«Ve chi il segnâl dal pat  
che o farai  
fra me e vualtris  
e cun ducj i vivents  
che a son cun vualtris  
par dutis lis gjenerazions a vignî:  
o met il gno arc intai nûi  
e al deventarà un segnâl di aleance  
fra me e la tiere.

Cuant che o pararai dongje  
i nûi sore la tiere  
e che si viodarà l'arc framieç dai nûi,  
jo mi impensarai dal pat  
che o vin fra me e vualtris  
e cun ducj i vivents, ven a stâi cun ogni cjar;  
e lis aghis no deventaran mai altri  
un diluvi par disfâ ogni cjar».

Peraule di Diu.

### SALM RESPONSORIÂL dal Salm 24

**R.** Lis stradis dal Signôr a son veretât e justizie.

Mostrimi, Signôr, lis tôs stradis,  
insegnimi i tiei troi.

Fasimi lâ indenant te tô fedeltât,  
parcè che tu tu sês il Diu che mi salve. **R.**

Visiti, Signôr, dal to boncûr  
de tô misericordie che di simpri e dure.  
Visiti di me seont il to boncûr,  
Signôr, te tô misericordie. **R.**

Bon e just al è il Signôr;  
par chel al indreçarà i pecjadôrs pe sô strade.  
Al fasarà cjaminâ i puars te sô justizie  
e ur insegnarà la sô strade. **R.**

### **SECONDE LETURE 1 Pi 3,18-22**

**L'arcje e je spieli dal batisim, che al salve.**

De prime letare di san Pieri apuestul  
Benedets, ancje Crist al è muart une volte par simpri pai vuestris pecjâts, lui just pai no juscj, par  
tornâus a menâ a Diu; fat murî seont la cjar ma tornât vîf seont il spirt.  
E in spirt al è lât a predicjâ la salvece ancje ai spirts che a spietavin in preson; lôr par vieri a vevin  
refudât di crodi cuant che la pazienze di Diu e spietave tai dîs di Noè, biel che al faseve l'arcje, dulà  
che dome pocjîs personis, vot in dut, a forin salvadis midiant da l'aghe. Spieli cheste dal batisim,  
che cumò us salve vualtris; che nol è il parâ jù la sporjetât dal cuarp ma il domandâi a Diu la  
salvece cuntune buine condote, in virtût de resurezion di Jesù Crist che al è a la diestre di Diu, dopo  
di jessi lât sù in cîl e di vê vude la paronance sui agnui, sui principâts e su lis autoritâts.  
Peraule di Diu.

### **CJANT AL VANZELI Mt 4,4**

**R.** Laut a ti, o Crist, re di eterne glorie!  
L'om nol vivarà dome di pan,  
ma di ogni perauale che e ven fûr de bocje di Diu.  
**R.** Laut a ti, o Crist, re di eterne glorie!

### **VANZELI Mc 1,12-15**

**Jesù, tentât di satane, al è servît dai agnui.**

Dal vanzeli seont Marc  
In chê volte, il Spirit al sburtà Jesù tal desert. E lui al restà intal desert par cuarante dîs, tentât di  
satane. Al jere cu lis bestiis salvadiis e i agnui lu servivin.  
Dopo che Zuan al fo metût in preson, Jesù al vignì in Galilee, predicjant il vanzeli di Diu. Al diseve:  
«Il timp si è colmât e il ream di Diu al è rivât. Poben, convertîtsi e crodêt tal vanzeli».  
Peraule dal Signôr.

**Si dîs** O crôt.

### **Su lis ufiertis**

Danus la gracie, Signôr,  
che la nestre vite e sedi ben intonade ai regâi che ti ufrîn  
tal celebrâ l'inizi di chest sacrament cussì venerabil.  
Par Crist nestri Signôr.

### **Antifone a la comunion Mt 4,4**

L'om nol vivarà dome di pan,  
ma di ogni perauale che e ven fûr de bocje di Diu.

**O ben:** cf. Sal 90,4

Il Signôr ti taponarà cu lis sôs plumis,

tu cjararâs ripâr sot des sôs alis.

### **Daspò de comunion**

Daspò di vênus sostentâts cul pan dal cîl,  
che al nudrîs la fede, al fâs cressi la sperance e al rinfuartîs la caritât,  
insegninus, Signôr, a vê fan di chel che al è l'unic pan vîf e vêr  
e a vivi di ogni peraule che e salte fûr de tô bocje.  
Par Crist nestri Signôr.

### **Preiere sul popul**

La tô benedizion che e dismanti bondante  
sul to popul, Signôr,  
par che inte tribulazion e cressi la sperance,  
inte tentazion si rinfuarci la virtût,  
e al puedi rivâ a la redenzion eterne.  
Par Crist nestri Signôr.